

Concierto di Chencho Kelly



ORANJESTAD (AAN):--- Dilanti un publico grandi na Cas di Cultura a tuma lugar e concierto di Chencho Kelly. Esaki a wordo teni den cuadro di Chencho su 40 aña como musico. Chencho, cu su apenas 15 aña, a cuminsa cu su carera musical saliendo for di un famia musical, hunto cu su rumannan Vicente y Franklyn. Chencho a start su tocamento riba bongo y campana pa despues sigui pa timbal, drum y tambora. Un di e prome agrupacion musical cu Chencho a participa como musico ta "Los Juveniles", un orkesta cu a haci diferente presentacion tanto na Aruba como den exterior. Tambe Chencho tabata integrante di "Vicente Kelly y Los Pimentosos" cu e estilo unico cu acordeon y henter un seccion di ritmo cual ta timbal, conga y drum. Nan a biaha pa Valledupar, Colombia, pa haci presentacion na e XXVII

Festival de la Leyenda Valenata. Cu su 18 aña di edad ela a cuminsa tuma curso di piano na e scol di musica Adayma cerca pianista Roberto Montiel (q.e.p.d.). Na 1983 su rumann Vicente Kelly a forma su propio agrupacion cu tabata yama La Nueva Fuerza y Chencho a forma parti di e banda aki tambe y diferente otro gruponan. Tambe a biaha pa diferente pais. Chencho a ricibi su certificado di Percucion Intensivo na Instituto Superior de Arte na Havana, Cuba y a gradua na 2006 pa su bachelor of Arts na Rotterdam Conservatorium y a sigui den musicologia na Universidad di Utrecht na Hulanda. Tambe Chencho a saca diferente LP y CD como percusionista. DIARIO ta manda pabien pa Chencho y cu Dios duna bo hopi aña mas di bida pa bo por alegra Aruba cu bo dushi musica.